

antworteten aber/Solten sie denn mit vnser Schwester/ als mit einer Huren / handeln?

XXXV.



ND Gott sprach zu Jacob/Mach dich auff/ vnd zueich gen Beth- BethEl /vnd wone daselbs/vnd mache daselbs einen Altar dem Gott/ Gen. 28. der dir erschein/da du flohest fur deinem bruder Esau.

DA sprach Jacob zu seinem Hauße vnd zu allen die mit im wa ren/Thut von euch die frembden Götter/so vnter euch sind/ vnd reiniget euch/vnd endert ewre Kleider/Vnd laßt vns auff sein/ vnd gen BethEl ziehen/Das ich daselbs einen Altar mache dem Gott/ der mich erhö ret hat/zur zeit meines trübsals/ vnd ist mit mir gewesen auff dem wege/den ich gezogen bin.

DA gaben sie im alle frembde Götter/ die vnter iren henden waren/ vnd ire Ohrenspangen/ Vnd er vergrub sie vnter eine Eiche / die neben Sichem stund/vnd siezogen aus. Vnd es kam die furcht Gottes vber die Stedte die vmb sie her lagen/das sie den sönen Jacob nicht nachiageten. Also kam Jacob gen Lus im lande Canaan/ die da BethEl heisst/sampt alle dem Volck/ das mit im war/ Vnd bauet daselbs einen Altar/vnd hies die stet BethEl / Darumb/das im daselbs Gott offenbart war/da er flohe fur seinem Bruder.

(Ohrenspangen) Lunulas/das man heisst gülden Sarband. Tu sind Perlenporten worden Prou. 25. Circulus aureus in naribus suis/vt Sup cap. xxiii.

(BethEl) Das ist Gott zu BethEl.

DA starb Debora der Rebeca amme/ vnd ward begraben vnter BethEl / Debora vnter der Eichen/vnd ward genemmet die Klageiche.

ND Gott erschein Jacob aber mal/ nach dem er aus Mesopotamia ko men war/vnd segenet in/vnd sprach zu im/ Du heissest Jacob/Aber du solt nicht mehr Jacob heissen/sondern Israel soltu heissen/ Vnd also hei

Israel.

stet man in Israel. Vnd Gott sprach zu im/ Ich bin der allmechtige Gott/ Sey fruchtbar vnd mehre dich/ Völcker vnd völcker hauffen sollen von dir komen/ vnd Könige sollen aus deinen Lenden komen. Vnd das Land/das ich Abraham vnd Isaac gegeben habe/ wil ich dir geben/ vnd wils deinem Samen nach dir geben. Also fuhr Gott auff von im/von dem Ort/da er mit im geredt hatte. Jacob aber richtet ein steinern Mal auff an dem ort/da er mit im geredt hatte/ vnd gos Trancopffer drauff/ vnd begos in mit öle/ Vnd Jacob hies den ort/da Gott mit im geredt hatte/ BethEl.

(Trancopffer) Das war wein wie das in den folgenden Büchern gangsam gesehen wird.

VND sie zogen von BethEl/ Vnd da noch ein feldwegs war von Ephrath/da gebar Rahel/Vnd es kam sie hart an vber der geburt. Da es ir aber so sawr ward in der geburt/sprach die Wehmutter zu ir/ Fürchte dich nicht/denn diesen Son wirstu auch haben. Da ir aber die Seele ausgieng/das sie sterben musste/hies sie in BenOni/Aber sein Vater hies in BenJamin. Also starb Rahel / vnd ward begraben an dem wege gen Ephrath/ die nu heisst BethLehem. Vnd Jacob richtet ein Mal auff vber irem Grab/dasselb ist das grabmal Rahel bis auff diesen tag.

Rahel stirbt. (BenOni) heisset meines schmerzen Son. (BenJamin) heisset der rechten Son.

VND Israel zoch aus/vnd richtet eine Hütten auff jenseit dem thurn Eder. Vnd es begab sich/ das Israel im lande wonet / Gieng Ruben hin / vnd schlieff bey Bilha seines vaters Ketsweibs/Vnd das kam fur Israel.

Ruben schlieff bey Bilha etc. XII. söne Jacobs

ES hatte aber Jacob zwelff Söne. Die söne Lea waren diese/Ruben der Erstgeboren son Jacob/Simeon/Leui/Juda/Isaschar/vnd Sebulon. Die Söne Rahel waren/ Joseph vnd BenJamin. Die söne Bilha Rahels magd/ Dan vnd Naphthali. Die söne Silpa Lea magd/ Gad vnd Asser. Das sind die söne Jacob/die im geboren sind in Mesopotamia.

ND Jacob kam zu seinem vater Isaac gen Mamre in die Heubtstad/die da heisst Hebron / da Abraham vnd Isaac frembdlinge innen gewesen sind. Vnd Isaac ward hundert vnd achzig jar alt/vnd nam ab/vnd starb/Vnd ward versamlet zu seinem Volck/ alt vnd des lebens sat/Vnd seine söne Esau vnd Jacob begruben in.

Isaacs alter. 180. jar.

DJS